

gradus perfectionis substantiae est gradus intellectivi. Ergo essentia Dei reponenda est in esse intellectivo purissimo.

Respondeo, dist. Major. Physice et quoad rem, *conc.*; secundum rationem, saltem secundum expressum et clarum conceptum, *neg.* *Disting.* pariter Minor.: gradus intellectivi est gradus perfectissimus substantiae, ita ut intellectivum formaliter sit perfectissimus gradus in *linea particulari* et praecise *intellecione*, *conc.*; ita ut includat summum gradum in *omni linea*, et concipi possit ut radix omnium attributorum, *neg.* Nihil ergo lucrantur Thomistae per haec aliaque similia argumenta, nisi statum questionis diversum constituerint.

Objic. *ix.* S. Thomas non semel docet, solas creaturas intellectuales prae se ferre imaginem Dei, eo quod illae sola attingunt similitudinem maximam Dei secundum rationem quasi specificam et differentiam ipsius, nimur vita intellectualis (1). Ergo ratio constituens essentiam Dei nostro modo concipiendi debet esse ratio vita purissima intellectualis.

Respondeo, neg. *conseq.* Primo quia ex S. Thoma ad rationem imaginis sufficit similitudo secundum accidens, vel proprietatem essentiae specificam (2). Præterea quod intellectivum sit in Deo quasi specificum et differentiale inter perfectiones expresse ac determinate considerata, sufficit ad hoc, ut rationales creature dicantur *imago Dei* ratione vitæ intellectualis. Ex eo autem quod intellectivum sit inter *determinatas* perfectiones quasi differentialis et specifica, non probatur, quod sit predicatum *absolute nobilis* et radix omnium perfectionum attributorumque divinorum: quæ sunt conditiones requisite ad constitutivum metaphysicum essentiae divine, prout appetit ex statu questionis. Predicatum enim actus puri et esse per se subsistentis est nobilis, quam intellectivum, ac tale, quod nequeat homo nec ulla alia creata res participare. Inter predicata vero particulaaria et determinata, quæ participari a rebus creatis possunt,

(1) Vide v. g. i p. quest. 93, art. 2 et reliquis articulis totius illius questionis; et i p. quest. præced.; et i p. quest. 33, art. 3; et in locis in precedenti articulo leudatis, ubi dictum est creature intellectuales divinas præ se ferre imaginem.

(2) Vide i p. quest. 93, art. 2, et locis mox citandis.

nobilissimum est gradus perfectionis, quam importat intellectivum, et propterea recte ex illo desumitur ratio imaginis in creaturis intellectualibus.

Dices. Imago ex D. Thoma est similitudo secundum naturam et speciem. Ergo necesse est, ut natura vel species divina constitutur per intellectivum, si in solis creaturis intellectualibus est imago Dei.

Respondeo, dist. ant. Imago perfecta est similitudo secundum natum et speciem, *conc.*; imperfecta, *neg.* *Dist.* etiam *conseq.* Si consideretur essentia divina secundum determinatam aliquam expressionem, secundum quam nostro modo concipiendi non potest esse radix et fons ceterarum perfectionum et attributorum, *trans.*; si consideretur essentia divina modo, quo in praesenti controversia consideratur, *neg.* Ad rationem imaginis imperfectae sufficit ex S. Thoma *similitudo secundum aliquod accidens proprium speciei et præcipue secundum figuram, sicut hominis imago dicitur esse in cupro* (1). Jam *similitudo perfecta Dei non potest esse nisi in identitate naturæ, unde perfecta ejus imago repertur in Filio suo primogenito, sicut imago regis in filio sibi connaturali; in homine autem, sicut in aliena natura, sicut imago regis in numero argenteo, ut patet per Augustinum in libro de Decem bordis (cap. 8, circ. med.)* (2). Ut ergo sit in homine imago Dei imperfecta, ex Angelico, non requiritur ut intellectivum concipiatur precise ut essentia Dei, sed sufficit, ut concipiatur, ut proprietas vel attributum nobilissimum divinitate naturæ: id quod ultra largimur.

CAPUT II DE ATTRIBUTIS DIVINIS GENERATIM

Declarata pro modulo ingenii nostri natura Dei in se, reliquum est, ut eam compareremus cum attributis, quorum ante omnia notio enucleanda est, mox distinctionis modus inquirendus.

(1) S. Thom. i p. quest. 93, art. 2. Cfr. ibid. art. 1. et art. 7, 8.

(2) S. Thom. i p. quest. 93, art. 1, ad 2.^{um} Cfr. art. 6, ad 1.^{um}

ARTICULUS I

Quid et quotuplex attributum.

*Varie
attributi
acceptiones:*

nomina Dei.

*Quid proprio
reniat
nomine
attributorum
Dei:*

*alii pressor
corundem
significatio,*

89. Attributum latissime dicitur quidquid de Deo praedicatur quomodo libet: quocirca in hoc sensu attributum complectitur quaslibet denominationes, sive intrinsecas sive extrinsecas, sive substantiales sive accidentales (nistro modo concipiendi), sive absolutas sive relatives, sive proprias sive metaphoricas. Et hoc sensu attributa divina vocari solent nomina divina. Non tamen quilibet nomina Dei tractanda nobis sunt sub appellatione attributorum. Alia enim sunt nomina Dei propria, alia pure metaphorica, ut cum v. g. Deo tribuuntur humana, vel ira et alii affectus vel passiones, et generatim omnia praedicata, que imperfectiōne aut limitatione in suo conceptu involvunt, nihil enim hujusmodi asseri Deo potest, nisi per metaphoram vel tropum aliquem. Alia perfectiones essentiales designant, alia vero alia, que a nobis concipiuntur instar accidentium vel proprietatum quarundam. At in presenti disputatione nec nomina metaphorica, nec nomina substantiam significantia vocari a nobis possunt in controversiam sub attributi denominatione. Etenim post expositam doctrinam de natura et substantia divina, nequit institui controversia de attributis, nisi haec aliquid aliquo modo distinctum a substantia exprimant. Itaque attributi magis proprie sunt praedicata illa et perfectiones, que nostro modo concipiendi substantiam divinam completam in suo esse supponunt, eique veluti quedam proprietates vel affectiones quasi superadduntur. Unde in hac acceptione a ratione attributi excluduntur praedicata tum substantialia tum etiam metaphorica, et nihil amplius. Haec, inquam, acceptio attributi propria est, quia revera inservit, ac sufficit ad dispellantas omnes illas controversias, quas solent communiter Theologi post tractatum de divina essentia instituere sub titulo divinorum attributorum.

Pressius adhuc magisque proprie intelliguntur attributa perfectiones absolute simpliciter tales ac necessarie, que a nobis concipiuntur per modum proprietatum adjacentium

essentiae divinæ. Unde excluduntur ab hac acceptione attributi non solum praedicata substantialia et metaphorica, sed etiam perfectiones relative divinarum Personarum, necnon denominations illæ, que nihil intrinsecum important in Deo, quod non pariter esset, etiamsi de facto non tribuerent illi, v. g. denominatio Creatoris, Domini, Redemptoris, Praedestinantis et quemcumque actum Dei liberum supponunt. Hæc enim omnia nihil in Deo ponunt, quo non potuisse carere absque detimento sue infinita perfectionis.

Denique pressissime attributum sumitur solummodo pro perfectionibus absolutis, que sint reales ac positive. Ac proinde in hac strictissima significatione praedicata negativa, v. g. immutabilitas, a ratione ac numero attributorum accenda essent (1).

Non desunt etiam, qui adhuc restringere amplius vellent notionem attributi, duas alias conditiones requirent; primo ut sit perfectio, quam naturali lumine cognoscere valeamus (2); ac secundo, ut sit perfectio analogie communis Deo et creaturis (3). Quod si quis admittere velit, immensitatem, æternitatem, aliasque perfectiones Dei solius proprias contra communissimam Theologorum consuetudinem cogenter nomine ac loco attributorum spoliare (4).

Haec tamen dicta sunt solummodo historice, ut pateat versus modus loquendi auctorum in hac parte. Nos vero, qui et lites de voce vitare cupimus (5), et notionem tales attributi reddere, que aptari possit praedicatis omnibus, que tractare sub eo nomine communiter solent Theologi et Philosophi, hic attributum sumimus in secunda ex praeditis acceptiōibus, definimusque ea praedicata Dei propria, que a nobis concipiuntur per modum proprietatum et affectionum essentiae divinæ.

*alia
pressissima.*

*Definitio
attributi*

(1) Videri possunt de his P. Suarez (*de Trinit.*, lib. 3, cap. 11), Gillius (op. cit. *de Deo*, lib. 2, tract. 2, cap. 5), Tanner (*de Deo*, disp. 2, quest. 1, dub. 1), Molina (In 1.^{am} part., quest. 28, art. 2, disp. 2).

(2) Ita Gabriel apud Suarez, loc. cit. num. 3.

(3) Ita Henricus, iōid. num. 4.

(4) Cfr. Suarez, loc. cit. et Gil, *ibid.* num. VII.

(5) Cfr. Suarez, *de Deo*, lib. 1, cap. 9, num. 13; *de Trinit.*, lib. 3, cap. 11.

et divisio

Multiplex est divisio attributorum in eo sensu explicatorum (1). Primo enim dividi possunt in affirmativa et negativa. Negativa sunt illa, que formaliter exprimunt remotionem aliquius imperfectionis a Deo, v. g. immutabilitas, infinitas, etc. Positiva sunt, que formaliter exprimunt rationem ac perfectionem positivam, ut bonitas, sapientia.

Secundo attributa, potissimum positiva, distribuuntur in absoluta et respectiva seu relativa. Absoluta sunt, que non continent respectum ad aliud, v. g. bonitas, intelligentia. Respectiva e converso habitudinem ad aliud important. Sed nota hic, primo quamquam a Theologis soleant considerari attributa relativa, quae exprimunt relationes ineffabiles spectantes ad tres Personas SS.^{mæ} Trinitatis, hæc tamen, utpote Philosophie penitus inaccessa, premenda nobis esse humili silentio in hac tractatione, nec unquam fore comprehendendam sub nomine attributi relativi, nisi id expresse significaverimus, sed ea duntaxat, quæ relationem important ad res creatas. Deinde inter prædicta ipsa, quæ dicunt relationem ad creaturem, alia sunt, que Deo nequeant non convenire, ut omnipotentia, idea rerum factibilium, et scientia possibilium omnium; alia vero, quæ possent absolute non competere, quamvis de facto competant, ut ratio Creatoris, Gubernatoris et alia id genus. Hic ergo nomine attributorum relativorum propriè veniunt tantummodo ea prædicta, quæ exprimunt ejusmodi rationes respectivas, que non necessario, sed libere et quodammodo contingenter de Deo prædicantur (2).

Alia est partitio attributorum in transcendenti et particulari: hac exprimunt perfectiones determinati generis, ut sapientia, voluntas; illa vero perfectiones per omnia genera patentes, ut bonitas, veritas, unitas.

Alia sunt attributa, que substantiam vel esse divinum respiciunt, alia operationem; prioris generis sunt æternitas, infinitas, etc., posterioris omnipotenta, intellectus, voluntas (3); priora quiescentia, altera actuosa vel operativa a quibusdam vocantur.

(1) Cfr. Suarez, *de Deo*, lib. 1, cap. 9.

(2) Vide Suarez, *de Deo*, lib. 1, cap. 9, num. 12, 13; lib. 2, cap. 32, num. 5.

(3) Vide S. Thom. 1^o dist. 22, quest. 1, art. 4.

Alia denique vocantur *physica*, alia *moralia*; prima naturam respiciunt, secunda mores.

ARTICULUS II

An et quid reale important attributa in Deo

90. Ratio dubitandi est, quia perfectio, quanu attributa ponerent in substantia divina, vel spectat ad essentiam vel non. Nequit autem dici non spectare ad essentiam, si perfectio est, sicutdem ex superius demonstratis constat Deum per essentiam suam esse omniperfectum. Si vero attributa contineant perfectionem spectantem ad essentiam, eo ipso cadere videtur a ratione attributi, modo explicata, quæ requirit, ut exprimat formam aliquam per modum proprietatis. Nihil ergo remanet positivum et reale, quod attributa ponant in Deo.

Ad hanc enodandam difficultatem, quidam dixerunt attributa divina, etiam ea, quæ positivis nominibus enuntiantur, nihil reale ac positivum ponere in Deo, sed negationem duntaxat et remotionem imperfectionis ac defectus oppositi, ut per hoc quod dicimus Deum esse viventem, non significamus vitam in eo aliud esse, sed removemus a Deo illum modum essendi, quo res inanimata existunt. Similiter cum dicimus Deum intelligentem, non intelligimus significare intellectum aliquid in ipso esse, sed removemus a Deo illum modum essendi, quo bruta existunt. Et sic de aliis (1). Alii vero dixerunt, attributa ejusmodi de Deo prædicari per quamdam habitudinem et connotationem ad creaturem; vel quia Deus causat certas quasdam perfectiones in rebus creatis (2), vel quia simil modo secundum proportionem operatur, ac causæ, creatæ formaliter

Ratio
dubitandi:

varie
sententiae.

(1) S. Thom. *de potent.* quest. 7, art. 5. Cfr. 1^o p. quest. 13, art. 2; *de veritat.* quest. 3, art. 1; 1^o dist. 2, quest. 1, art. 3; dist. 34 art. 1.

(2) *Per hoc quod Deo scientiam attribuimus, vel aliiquid hujusmodi, nihil in eo ponimus, sed significamus ipsum esse causam scientie in rebus creatis, ut ex hoc dicatur Deus sciens, quia scientiam creaturis infundit.* S. Thom., *de veritat.* quest. 2, art. 1. Cfr. 1^o p. quest. 13, art. 2; 1^o dist. 2, quest. 1, art. 3; dist. 35, art. 1.

habentes illa atributa (1); quod perinde est, ac dicere nomina omnia divinorum attributorum esse metaphorica, vel attributa omnia Deo asseri per quamdam metaphoram. Has omnes sententias tribuit Angelicus (2) Avicennæ et Rabbi Moysi (3).

91. PROPOSITIO 1.^a Attributa negativa et contingenter relativa ad creaturas, formaliter considerata, nihil reale in Deo exprimit; quamquam materialiter ac fundamentaliter considerata divinam ipsam substantiam designant.

Attributa
negativa
et contingenter
relativa
formaliter
considerata
nihil reale in
Deo
exprimit,

materialiter
autem spectata
ipsam Deli
substantiam
designant.

Prima pars patet. Nam attributa negativa formaliter negationem demonstrant, negationem nimurum imperfectionis ac deficientis modi se habent, qui reperitur in entibus causatis. Itemque relativa illa meram habitudinem, eamque rationis, involvunt ex parte Dei versus creaturas, que habitudo ita de facto concipitur esse in Deo, supposita creatione, ut potuerit non esse absque ullius imminutione divinæ realitatis. Atqui nec mera negatio nec mera rationis relatio reale quiddam ac positivum est. Ergo...

Altera pars probatur. Quia ejusmodi attributa ita negationem et habitudinem rationis denotant principaliter, ut secundario etiam et quoad materiales indicent subjectum ipsum, a quo removentur illæ imperfections, cuique per intellectum nostrum tribuitur respectus ad creaturas. Atqui subjectum illis attributis insignitum ipsa divina substantia est. Ergo (4).

(1) *Scientia et alia hujusmodi*, ut refert idem Angelicus, *Deo attribuantur per quamdam similitudinem proportionis*, sicut attribuitur ei ira vel misericordia, aut hujusmodi exteriores passiones. Dicitur enim Deus iratus, in quantum facit effectum similem irato, scilicet quia punit, qui est effectus iræ in nobis, quamvis in Deo passio iræ esse non possit. Similiter dicunt, quod Deus dicitur sciens, quia effectus facit similem scientis; sicut enim opera scientis procedunt ex determinatis principiis ad determinatos fines, ita opera nature, que divinitus sunt. S. Thom. de verit., quest. 2, art. 1. Cfr. de potent., quest. 7, art. 5; et 1.^a dist. 2, quest. 1, art. 3; et dist. 37, art. 1.

(2) 1.^a dist. 2, quest. 1, art. 3. Cfr. i p. quest. 13, art. 2; *de potent.* quest. 7, art. 5,

(3) Quorum doctrinam Aquinas mitius judicavit in lib. 1.^a sententiariam, quam in reliquis locis citatis.

(4) Cfr. Suarez, *De Deo*, lib. 2, cap. 3, num. 4-8.

Dicendum, inquit S. Thomas, quod de nominibus, quæ de Deo dicuntur negative, vel quæ relationem ipsius ad creaturam significant, manifestum est, quod substantiam ejus (secus atque nomina, quæ absolute et affirmative de Deo praedicantur) nullo modo significant, sed remotionem aticujus ab ipso vel relationem ejus ad aliud, vel potius aticujus ad ipsum (1).

Ia tamen non vetat, quoniam ejusmodi attributa in proprio sensu de Deo praedicentur. Cum enim non significant formaliter speciem aliquam rei create, immo vero tales significant rationem, saltem pieræque illarum, quæ nulli rei create convenire possit, divinæ naturæ maxime propria sunt.

92. PROPOSITIO 2.^a Attributa affirmativa absoluta non praedicantur de Deo solummodo negative, nec solum ad notandum causalitatem divinam circa creatas perfectiones, aut similitudinem in modo operandi; sed ad designandum aliquid positivum intrinsece et formaliter Deo conveniens.

Prima pars. *Attributa affirmativa absoluta non praedicantur de Deo solum negative*, Probatur 1.^a, quia si omnis ratio positiva Deo attributa non ideo praedicatur, ut aliquid in ipso positive repertum affirmetur, sed solum ad removendam imperfectionem; nulla est ratio positiva, quæ non posset aque bene praedicari de Deo, ac sapientia v. g. vel bonitas. Quævis enim ratio et species crea continua continent propriam differentiam, atque ideo excludit, ac removet a se aliquem actum et imperfectionem reliquarum specierum. Unde præcise ad hanc imperfectionem removendam posset in adversariorum sententia Deo attribui. Et sic Deus praedicari posset v. g. *corpus*; ad significandum, quod non est ens in potentia, sicut materia prima; et *Ieo*, ad significandum, quod non habet modum essendi hominis vel avis (2), etc. 2.^a Idem confirmat sensus communis Patrum et christianorum non omnium, qui profecto cum Deo tribuunt positiva nomina, non

Attributo
affirmativa
absoluta
non praedicatur
de Deo solum
negative,

(1) i p. quest. 13, art. 2 in corp.; et art. 7. Et vide in hunc locum card. Tolosum, Valentia, Vazquez et Cajetanum.

(2) Vide S. Thom. i p. quest. 13, art. 2; *de potent.* quest. 7, art. 5.

intendunt solum imperfectiones removere, sed etiam aliquid positivi significare (1).

Secunda pars: Attributa non prædicantur de Deo solum ad denotandam causalitatem. Prob. 1.^o ex hoc eodem argumento. Id enim est contra intentionem loquentium de Deo. Aliud enim intendunt dicere, cum dicant Deum viventem, quam quod sit causa vite nostræ, vel quod differat a corporibus inanimatis (2). 2.^o Secus eadem ratione de Deo prædicari posset, quidquid in rebus causal, ut dicitur moveri, quia causat motus in rebus (3). Non enim minus est Deus causa motus vel corporis altiarumque entitatum, que attributi Deo negeunt, quam bonitatis aut sapientie, que ab omnibus de illo verissime prædicantur. 3.^o Ex contraria denique sententia sequeretur, quod omnia nomina dicta de Deo, per posterius dicentur de ipsis; sicut sanum per posterius dicitur de medicina, eo quod significat hoc tantum, quod sit causa sanitatis in animali, quod per prius dicitur sanum (4). Itaque nequit esse tanta ratio attribuendi Deo certa prædicta, quod sit causa producens perfectiones iisdem designatas in creaturis.

Tertia pars: Attributa non prædicantur de Deo solum ad denotandam similitudinem in modo operandi. Probatur, nam contraria positio multipliciter est contra sensum communem omnium. Ergo... Sane 2.) secundum illum loquendi modum omnia attributa positiva Deo per metaphoram competenter. Atqui aliter sentiunt omnes... Apposite S. Thomas: Secundum hanc expositionem nulla differentia esset inter hoc, quod dicitur: Deus est sapiens, et: Deus est iratus, vel: Deus ignis est. Dicitur enim iratus, quia operatur ad modum irati, dum punit; hoc enim homines irati facere consueverunt. Dicitur etiam ignis, dum purgat, quod ignis suo modo facil. Hoc autem est contra positionem Sanctorum et Prophetarum loquentium de Deo, qui quædam de Deo probant, et quædam ab eo removent. Probant enim esse vivum, sapientem et bivismodi, et non esse corpus,

*aut similitudinem in
modo in
operando,*

(1) S. Thom. ibid.

(2) I p. quest. 13, art. 2.

(3) *De veritat. quest. 2, art. 1.* Cfr. I p. quest. 13, art. 2; *de potent. quest. 7, art. 6 post med.*

(4) S. Thom. I p. quest. 13, art. 2. Cfr. *de veritat. quest. 2, art. 1; de potent. quest. 7, art. 6 post med.*

neque passionibus subjectum. Secundum autem prædictam opinionem omnia de Deo pari ratione possent dici, et removeri non magis hec, quam illa (1). 2) Præterea si vera esset contraria doctrina, nulla attributa Deo ab æterno convenirent aut necessario, sed omnia in tempore et contingenter. Atqui plura ex communi sententia de Deo prædicanda necessario sunt atque ab æterno. Major constat. Nam si ratio, cur attributum aliquod de Deo prædicetur, est similitudo in operando, attributum nullum ei convenit, nisi supposita operatione ad extra. Jam vero secundum fidem catholicam omnis divina operatio ad extra in tempore est a libere, non necessario et ab æterno. Ergo (2)... Et hoc argumentum valet etiam pro parte precedenti hujus propositionis.

*sed ad
designandum
aliiquid
inveniatur
ac formaliter
Deo
competens.*

Quarta pars: *Attributa positiva absoluta designant aliquid intrinsecum et reale Deo formaliter competens.* Probatur; est enim precedentium corollarium. Nam si non significant puram negationem, nec connotant solam causalitatem ac similititudinem in operando, aliud non restat, nisi quod importent veram ac realem formam in Deo verissime existentem, ut jam magis enucleandum est.

93. PROPOSITIO 3.^o *Attributa Dei affirmativa absoluta, quamquam a nobis instar proprietatum, essentiam divinam consequentium, apprehendantur, re tamen vera ipsam divisionem substantiam significant (3).*

Probatur. Nam Deus per essentiam suam perfectissimum est, habetque actum omnis perfectionis excogitabilis modo perfectissimo. At vero talis certe non foret, si attributa divina non ipsam essentiam, sed aliquid a parte rei essentie superadditum implicarent. Quod enim essentie advenit, essentialiter non possidetur.

*Attributa
Dei
affirmativa
absoluta,
quamquam a
nobis instar
proprietatum
apprehen-
dantur, re tamen*

(1) S. Thom., *de potent. quest. 7, art. 5.*

(2) Vide S. Thom., *ibid.*; I.^o dist. 2, quest. 1, art. 2; *de Potent. quest. 7, art. 6, post med.*

(3) *Deo hoc est esse, quod fortè esse, vel sapientem esse, et si quid de illa simplicitate diversis, qua ejus substantia significatur.* S. Aug., *de Trinit. lib. 7, cap. 1.* Cfr. cap. 7 per totum; et liber. 6, cap. 4.

vera ipsam
divinam
substantiam
significant.

Itaque si nos attributa per modum proprietatis apprehendimus, ideo est, quia eminentissimam illam Dei essentiam, prout in se est, intelligere non valemus, sed per species rerum creatarum, perque actus mentis iteratos aliqualiter quasi enigmatae quadam representamus. Hinc quae perfectiones in creatis accidentium habent rationem, in Deo quoque simili modo concipiuntur; et postquam essentiam illam simplicissimam atque ineffabilem confuse apprehendimus sub conceptu ipsius esse per se subsistentis, magis magisque deinceps per alios actus cognitionis, varias particulas perfectiones singillatim representantis, declarare nobis nitimus (1).

SOLVUNTUR DIFFICULTATES.

94. **Objic.** 1.^o Attributa haec essentialiter sunt finita et restricta, cum rationes perfectionum particulares exprimant. Sed nihil finitum ac restrictum realiter in Deo esse potest. Ergo.

Respondeo, dist. Major.: prout participantur a creaturis, conc.; prout sunt in Deo, neg. Rationem additam distinguo, etiam: Attributa secundum praescionem mentis nostrae rationes particulas exprimunt, conc.; ex parte ipsis rei, neg. Et concessa Minore, neg, conseq. Verum haec clariora fient ex dicendis in articulo sequenti.

Objic. 2.^o Si attributa a parte rei substantiam ipsam denotant, a nobis vero instar proprietatum apprehenduntur, fallitur mens nostra in eorum cognitione. Dicendum ergo est, quod vel non exprimunt aliquid substantiale, vel nequeunt apprehendi per modum proprietatis.

Respondeo, dist. antec.: si mens affirmaret ita esse attributa in Deo in suo reali actu, prout apprehenduntur, conc.; secus, neg.

Objic. 3.^o Sæpe Patres videntur negare, quod perfectiones et attributa Deo insint. Atqui nihil, quod substantiam aliquius rei significet, de eo negari potest. Ergo.

(1) Vide S. Thom. 1^o dist. 33, quest. 1, art. 1; 1 p. quest. 13, art. 2; de potent., quest. 7, art. 5.

Respondeo, dist. antec. Ad ostendum, perfectiones et attributa illa non inesse Deo secundum modum definitum et praescivum et quasi accidentalem, quo a nobis apprehenduntur, et quo solent in creatis reperiri, conc.; ad removendas omnino illas perfectiones a divina substantia, neg. Et contra dist. Minor, neg. conseq. Vide S. Thomam (1), apud quem plura reperies (2).

ARTICULUS III

An et quomodo attributa distinguuntur tum
invicem, tum ab essentia Dei?

95. In hac questione, notamus cum Suarezio, sermo est de attributis, quatenus aliquid reale et positivum in Deo ponunt, et ponere concipiuntur. Nec enim de negativis vel relationibus rationis dubitari potest, quomodo distinguuntur ab essentia Dei, quia cum nihil formaliter sint, non possunt habere realem identitatem cum essentia, nec propriam distinctionem positivam (ut sic dicam ex parte termini), sed negative dici possunt non habere identitatem. Quo autem formaliter de relatione vel negatione, nam si per illa circumscribitur, vel indicatur perfectio aliqua, qua sit fundamentum relationis vel negationis, in illa poterit habere locum proposita quæsto» (3).

Jam quod propositum questionem attinet, Gualterus quidam (4) et alii realiter distinguunt autumrunt divinam essentiam et attributa, eademque sententia tribuitur a multis Gilberto Porretano (de la Poirée), Pictaviensi episcopo (sec. XI), quamquam non una est Theologorum sententia circa veram

Status
questionis

Rebus
distinctiōnēs
assortōrēs

(1) De potent., quest. 7, art. 5, ad 2.^{um}

(2) Ibid., et 1 p. quest. 13, art. 2.

(3) Suarez, De Deo, lib. 1, cap. 10, num. 1. Cfr. Metaphys. disp. 30, sect. 6, num. 2.

(4) Apud Augustinum Niphum (In lib. 12.^{um} Metaphys., disp. 13, cap. 3).

Gilberti doctrinam (1). Gregorius etiam Palamas, cuius assemblae dicti sunt Palamite (sec. XIV), docuit re distinguiri essentiam et operationes Dei. Verum hunc errorem Theologis fuisse rejiciendum relinquimus. Nam manifestum est tum ex ratione actus puri et esse per se substantis, tum ex disputandis super simplicitate divinae naturae, prorsus repugnare quamlibet realem distinctionem. Id quod supponendum nobis etiam est ex fide divina, certissimisque documentis ecclesiasticis (2).

§ I.—UTRUM ATTRIBUTA DIVINA SIVE INTER SE SIVE A DIVINA SUBSTANTIA ACTU EX NATURA REI DISTINGUANTUR.

Se tisie
distin^{tio}nem
attributorum
ex natura
rei assurunt.

96. Tota ergo controversia hoc devolvitur, an attributa sive invicem sive ab essentia ratione duntaxat discriminantur. Quia in re celebris est sententia Scoti, vel certe Scotistarum (3), qui et in hac et in aliis etiam materiis distinctionem

(1) Vide Card. Hergenrother (*Hist. de la Igles.*, tom. 4), Hefele (*Histoire des Conciles*, tom. 7, pag. 399 seqq.), R. P. De San (*De Deo uno*, pars. 2.^a, cap. 2, pag. 103 seqq. in nota; et pars. 3.^a, cap. 1, pag. 204. Lovaini, 1804).

(2) Vide Conc. Toletan. XV (apud Denzinger, num. 250, pag. 80), et Cone. Remensem in causa Gilberti Porretani ab Eugen. III, anno 1141, celebratum, ubi haec leguntur: *Credimus et confitemur simplicem naturam divinitatis esse Deum, nec aliquo sensu catholicis posse negari, quin divinitas sit Deus et Deus divinitus. Sicuti vero dicitur: Domini sapientia sapientem, magnitudine magnum, divinitate Deum esse et alia hujusmodi: credimus non nisi ea sapientia, qua est ipse Deus, sapientem esse; non nisi ea magnitudine, qua est ipse Deus, magnum esse; non nisi ea aeternitate, qua est ipse Deus, aeternum esse; non nisi ea unitate unum, qua est ipse Deus; non nisi ea divinitatem Deum, qua est ipse; id est, seipso sapientem, magnum, aeternum, unum Deum. — Cum de tribus personis loquimur, Patre, et Filio et Spiritu Sancto, ipsas unum Deum, unam divinam substantiam esse faciemus.* Apud Denzinger, num. 320, pag. 111. Cfr. definitio Lateranensis IV (ann. 1215), contra Abbatem Joachim et Almarium (Denzinger, num. 358, pag. 120, 121). Lege Suarez de hac re, *De Deo*, lib. 1, cap. 10, num. 1; *Metaphys.* disp. 30, sect. 6, num. 2; et alios Theologos passim.

(3) Nam de vera mente Subtilis Doctoris forte non satis constat. Vide Suarez (loc. cit.), et Vazquez (In 1.^{um} p. disp. 116, cap. 3), Gil (op. cit., lib. 2, tract. 5 cap. 5).

quamdam invixerunt medium inter realem et rationis, quam formalē dixerūt (1), et per quam licet attributa et essentia unam solam substantiam efficiant, nihilominus independenter ab omni mentis consideratione unum actu non sit aliud ex ipsa natura rei, nec proinde sola ratione distinguantur. Ceteri vero Philosophi ac Theologi, quibus non minus sere doctrina haec displicet, quam ipsa distinctio realis, solam admittunt distinctionem rationis, quamquam disputant adhuc, num ea sit distinctio rationis ratiocinantis, an vero rationis ratiocinante seu cum fundamento in re. Nihilominus communissime consentiunt Scriptores in admittenda distinctione rationis ratiocinantis, quam propterea fundamentalē ac etiam virtualem vocant. Ecce autem inter hos ipsos AA., jam inde a duobus aut tribus seculis accerrimum dissidium evasit, alii sola distinctione virtuale extrinseca contentis, alii vero distinctionem virtualem intrinsecam requirentibus (2).

Nos hanc distinctionem virtualem intrinsecam, utpote ad ea omnia, que ratio humana naturali lumine capere de perfectionibus divinis potest, explicanda minime necessariam, omnissimum in presentiarum, ac Theologis dogmaticis discutiendam relinquimus (3). De ceteris autem quid sentiamus, aperiendum jam est.

97. PROPOSITIO. 1.^a Attributa divina neque inter se neque ab essentia divina distinguuntur actu ex natura rei, quemadmodum contendunt Scotistæ.

Argumenta theologica ex sacris Litteris Patribusque de prompta videri passim possunt apud Theologos. Ratione vero

quam eatori
repelunt,
solam rationis
distinctiōnē
admittentes,
inter quas
sunt adhuc
variae
opiniones

(1) Vide que in *Ontologia* scripta sunt de hac distinctione, n.^o 117 seqq., pag. 301 seqq.

(2) Haec iam explicata manent in *Ontolog.*, n.^o 106, pag. 324, 325.

(3) Eam vero generatim breviter refutatam reliquimus in *Ontolog.*, num. 106, pag. 324, 325. Difficilias praecipua, que multis scriptores movit ad distinctionem virtualem intrinsecam amplectendam, petitur ex divinis Personis seu attributis Dei relativis; cum ergo nequeat controversia haec a Philosopho pro dignitate pertractari, convenientius Theologis integra relinquitur.

Attributa
divina
neque inter se
neque ab essentia

distinguuntur
actu ex
natura rei.

Probatur 1. Si attributa ex natura rei distinguerentur sive inter se sive ab essentia, Deus non esset omnino simplex. Atqui simplicissimus est, quemadmodum nunc supponimus, et suo loco demonstrabimus.

Major per se patet. Secus enim erit in Deo multitudo formalium rationum, quarum una non sit alia secundum rem ipsam. Id vero quanto per divina simplicitati officiat, quis non videat? Certe unaquaque illarum rationum simplior reipsa foret, quam omnium complexio (1).

Prob. 2. Deus est ens per suam essentiam perfectissimum. Ergo perfectiones omnes de illius essentia sunt, ac proinde nequeunt ab ea ulio modo actualiter distinguiri (2).

Prob. 3. Si Deus per essentiam suam non est bonus, sapiens, justus, etc.; essentia divina comparatione bonitatis, sapientiae, justitiae, etc., se habebit ut potentia ad actum. Atqui id repugnat rationi actus puri Deo convenientis. Ergo.

Prob. 4. Si attributa ab essentia distinguntur actu, ita prout formaliter distincta vel erunt aliiquid aequalē, vel superius, vel inferius, quam essentia. Si aequalē habebuntur plures essentiae divinae; si superior essentia divina non esset perfectissima, nec infinita; si inferius, erunt aliqua creatura (3).

Ob has aliasque rationes theologicas plures DD. graviori censura notarum scotisticam doctrinam (4). Veritatem hanc agnovit ipse Alcinous, Philosophus Platonicus, cuius haec pulcherrima perhibetur sententia: «Deus ipse supremus, aeternus, ineffabilis, seipso perfectus, nullius rei indigens, divinitas, essentiae ratio, veritas, harmonia, bonus existit. Nec vero haec ita diu numero, ut inter se ipsa disjungam, immo-

(1) Vide Molina (In 1.^{am} part. quest. 28, art. 2, disp. 2), Tole-
tum (In 1.^{am} part. quest. 13, art. 4).

(2) Vide Suarez, *Metaphys.* disp. 30, sect. 6, num. 3.

(3) Plura dabunt Molina (loc. cit.), Gillius (*de Deo*, lib. 2, tract 5, cap. 5 seqq.), Suarez (lib. 1, *de Deo*, cap. 10; *Metaphys.* disp. 30, sect. 6), Toletus (1.^{am} Pars, quest. 13, art. 4), Vazquez (In 1.^{am} part. disp. 116, cap. 5, 3), Cajetan. (*Super. opusc. de Ent. et essent.* quest. 2, et 1 p. quest. 13, art. 4).

(4) Ita v. g. Molina, Toletus, Catharinus aliquae apud Tanner (*de Deo* disp. 2, quest. 1, dub. 2, num. 5).

ut unum potius cuncta considero (1). Alios Philosophos gentiles ejusdem veritatis assertores vide, si vis, apud Gillium (2).

98. Objic. 1. De iis, quæ ante omnem mentis considerationem sunt unum idemque, nequeunt predicari predicta contradictoria. Atqui de divina essentia et attributis contradictoria praedicantur. Nam Deus intellectu intelligit, et non voluntate, et voluntate vult, non intellectu, et per justitiam puni, non vero per misericordiam.

Respondeo, dist. Major.: de eadem re, quæ non sit virtute ac ratione multiplex, *conc.*; quæ ob eminentiam suam pluribus in sua simplicitate aequivaleat, *neg.* Et *contradic.* Minor.: de essentia et attributis, quatenus diversæ rationes præ se ferunt, *conc.*; secus, *neg.* Et *neg.* consequens.

Objic. 2. Sapientia et bonitas in genere ex natura rei differunt, siquidem habent diversas definitions. Ergo etiam sapientia et bonitas divina.

Respondeo, neg. ant. cum Hervæo (3), Argentinatæ (4), Suarez (5), Vazquez (6) aliisque. Nam sapientia et bonitas, aliaeque similes perfectiones analogice communes Deo et creaturis, nec distinctionem nec indistinctionem necessario in suo abstractissimo conceptu vindicant, sed præscindunt per se a distinctione vel indistinctione, cum nec includant, nec excludant se invicem necessario, quia nec ratio sapientiae importat per se rationem bonitatis, nec pugnat cum ea, et similiter se habet vicissim ratio bonitatis respectu sapientiae. Itaque si actu distinguntur in creatis, id est pro ipsorum conditione ac natura, non vero ex necessitate formarum ipsarum. Unde et conversè in ente summe perfecto et simplicissimo identificata reperiri debent.

Objic. 3. Sæpe ab uno attributo colligitur aliud per demonstrationem, et ex essentia constituta per plenitudinem

(1) Apud Ludovicum Vives *super Aug. de Civitat. Dei*, lib. 8, cap. 6.

(2) Loc. cit., cap. 5, num. 5.

(3) *Quodlib.* 1, quest. 2.

(4) 1.^{am} dist. 6, quest. 1, art. 2, apud Tanner, disp. 2, quest. 2, dub. 2, num. 11.

(5) *De Deo*, lib. 1, cap. 13, num. 5.

(6) In 1.^{am} part., disput. 116, cap. 6.

actualitatis inferri omnia possunt attributa. Atqui inter rem demonstrandam mediumque demonstrationis actualis distinctio intercedat, oportet. Secus enim termini demonstrationis forent synonymi, idemque per idem probaretur.

Respondeo, neg. Minor. et probation. Sufficit enim distinctio rationis cum fundamento in re ad vitanda omnia incommoda, quæ in objectione opponuntur.

Objic. 4.^o A summe perfecto debet abesse omnis confusio. Sed si omnia sunt idem in Deo, inducitur summa confusio.

Respondeo, neg. Minor. Confusio enim, cum sit inordinata plurius multiplicitas, essentialiter supponit plura. Ubi ergo identitas est, confusio locum non habet.

Objic. 5.^o Singula attributa seorsim sumpta magis identica sunt ipsis, quam cum aliis. Atqui secum sunt ex natura rei identica. Ergo ex natura rei differunt ab aliis.

Respondeo, dist. Major.: a parte rei, neg.; per rationem, trans. Dist. Minor.: secum ipsis sunt identica tum ex natura rei, tum etiam ratione, conseq.; solum ex natura rei, neg. Et neg. conseq.

Objic. 6.^o Deus intellectu intelligit mala, voluntate non vult mala. Ergo antecedenter ad mentis operationem intellectus et voluntas distinguuntur.

Respondeo, neg. cons. Ad hæc enim et similia prædicta contradictoria explicanda, sufficit distinctio rationis modo exposita. Quid, quod objecio, si quid probat, probat etiam adesse plures actus voluntatis in Deo? Nam pari modo sic argumentari licet: Deus vult bona, et non vult mala. Ergo volitus, qua vult bona, differt a volitione, qua mala reprobat.

Objic. 7.^o Objectum supponit, ac præcedit actum potentiae intellective. Sed Deus uno actu concipitur bonus, et alio justus. Ergo bonitas et justitia distinctæ actu supponendæ in Deo sunt.

Respondeo, dist. Major.: quoad rem ipsam, conseq.; quoad modum concependi, neg. Et concess. Minore, neg. conseq. Itaque tum in hac, tum in aliis materiis aliud est objectum, quod intelligitur, et aliud modus intelligendi; sepe enim fit, ut quod in re unitum est, distinctis actibus intelligatur. Id

quod necessarium omnino efficit in praesenti casu tum eminencia divina perfectionis, tum modus noster cognoscendi Deum per species rerum creatarum, quemadmodum mox explicabitur.

Objic. 8.^o Ea distinguuntur actu, quæ ad diversas pertinent categorias. Sed essentia et attributa ita se habent. Ergo.

Respondeo, neg. Major. et suppositum Minoris. Quia nec ad distinctionem categoriarum opus est actualis distinctio rationum, ne deus nec quidquam Deo intrinsecum sub illa categoria continetur, quemadmodum inferioris demonstrabit (1).

§ II.—AN ET QUO PACTO ATTRIBUTA DIVINA SIVE INTER SE SIVE
A NATURA DISTINGUANTUR RATIONE.

99. Exclusa distinctione tum reali tum formali ex natura rei, tum etiam virtuali intrinseca, sequitur nullam esse posse inter naturam et attributa divina, saltem quantum attingi ratione queunt, distinctionem *actualem* illius generis, nec internam ipsi divinae realitati (2), sed solum externam et rationis, in eo sitam, quod de una eademque objectiva realitate diversi formentur a nobis conceptus. Verum distinctio hæc extrinseca vel rationis duplex distingui solet, altera rationis ratiocinata, altera rationis ratiocinans: postrema hæc obtinet inter ea, que nullum præbent distinctionis fundamentum, qualia sunt illa, que vocabulis pure synonymis significantur, ut ensis et gladius. Distinctio vero rationis ratiocinatae habet fundamentum in re, ideoque et vocatur fundamentalis et virtualis extrinseca (3), que definiri posset cum P. Christophoro Gillio «aptitudo quædam objecti seu vis determinandi intellectum impertecte intelligentem ad formandos plures conceptus præcisos saltem inadæquate, sub diversis

Distinctio
rationis dupla,
rationis
ratiocinans
ac rationis
ratiocinante,
que dicuntur
etiam virtualis
extrinseca
et fundamen-
talis.

(1) Difficultates, quæ forte opponuntur ex divinis attributis relativis, ad Theologos remittende sunt.

(2) Fides vero divina docet realem distinctionem attributorum relativorum seu Personarum divinarum inter se, ac realem eorumdem cum essentia identitatem.

(3) Vide *Ontolog.* num. 105, pag. 317.

Fundamentum
distinguendi
quatuorplex.

rationibus terminatos ad idem objectum» (1). Cæterum fundamen-tum distinguendi per rationem triplex distingui solet ut alibi explicuitur (2): *primum* est eminentia perfectionis in re simplici, quæ cum sit una in se, multis æquipollat: quo pacto anima rationalis concepi potest ut principium vegetandi, sentiendi, et intelligendi; et intellectus æquat, et superat omnes sensus, quia *unica virtute* cognoscit omnia, quæ pars sensitiva diversis potentiis apprehendit et alia multa, etc. (3). *Alterum* est separabilitas perfectionum, quæ unitæ in aliquo subiecto reperiuntur. Hoc modo quia ratio substantiae inest lapidi sine vita, et ratio viventis in planta sine sensu et intellectu, perfectiones haec omnes apprehendi possunt præcise, prout dispersæ inesse valent ac separatae in diversis subiectis, etiam tum cum unum reapse sunt in aliquo, v. g. in homine. *Tertium* fundamentum non est aliquid intrinsecum rei, cuius diversi formantur conceptus, sed extrinsecum, nempe connotat vel respectus ejus ad varios terminos aut effectus. Sic idem simplex punctum secundum eamdem intrinsecam entitatem cogitari diversimode potest, prout est principium aut terminus lineæ vel centrum circumferentie.

Variae
sententiae.

Itaque Aetius et Eunomius (sac. IV) noluerunt agnoscere distinctionem rationis ratiocinante, sed solum rationis ratiocinantis, vel solius nominis, inter essentiam et attributa divina sive absoluta sive relativa etiam et personalia. Nominales vero cum Gregorio Ariminensi (4), Gabriele (5), Occam (6), Joanne Majore (7), Aureolo (8) et card. Petro de Alliaco (9), dixerunt divina attributa solum inter se distinguiri per diversa connotata, vel quia diversos respiciunt effectus, quin tamen exprimant rationem diversam ipsi Deo intrinsecam. Verum communissima sententia cum S. Thoma tenet

(1) P. Gil, lib. 2, tract. 6, cap. 7.

(2) *Ontolog.*, num. 105, pag. 317, 318.

(3) S. Thom. *Contr. Gent.*, lib. 1, cap. 31.

(4) 1.^a dist. 7, quest. 2, art. 1.

(5) 1.^a dist. 2, quest. 8.

(6) 1.^a dist. 2, quest. 1.

(7) 1.^a dist. 2, quest. 1.

(8) 1.^a dist. 2, quest. 3, art. 4; et dist. 45, quest. unic., art. 3.

(9) 1.^a dist. 8, quest. 6, art. 2.

attributa divina sive inter se sive ab essentia distinguiri etiam virtualiter extrinsece, seu cum fundamento ex parte ipsius Dei.

:00. PROPOSITIO 2.^a Attributa divina tum inter se tum ab essentia non distinguuntur sola ratione ratiocinante, nec per connotationem duntaxat ad externos effectus, sed distinctione rationis cum fundamento in re, quam vocant etiam virtuale distinctionem (1).

Prima pars: *Attributa divina... non distinguuntur sola ratione ratiocinante*, est contra Eunomium.—Probatur autem 1.^a quia de eodem subiecto tum re tum ratione enumari nequeunt prædicta contradictoria; nihil quippe potest simul esse et non esse. Atqui de divina essentia et attributis prædicantur contradictoria. Ergo.—Minor probatur. Dicitur enim Deus *justitia* punire, et non *misericordia*, et e converso parcere *misericordia*, non *justitia*. Itemque essentia divina prout talis non dicitur intelligere aut velle, sed prout principium intelligendi et volendi.

Prob. 2.^a Ea distinguuntur, saltem ratione, quæ habent diversas rationes ac definitiones et intelligibilitates. Atqui essentia et attributa divina diversas habent rationes atque intelligibilitates. Ergo..

Minor patet. Nam *scendum est, quod ratio, prout hic sumitur, nihil aliud est, quam id quod apprehendit intellectus de significacione aliquius nominis: et hoc in his, que habent definitionem est ipsa rei definitio, secundum quod Philosophus dicit (4.º Metaphys., text. 11 circ. fin.): Ratio, quam significat nomen, est definitio (2).* Jam vero planum est, id quod apprehenditur

(i) Nostrum non est, ut jam monui, considerare attributa divina relativa seu Personas: si vis autem nosse, quid addant essentie, vel quo pacto se habeant respectu illius, lego Doctorem Eximium, *Metaphys.* disp. 30, sect. 5, num. 6.

(2) S. Thom. 1.^a dist. 2, quest. 1, art. 3, init. corpor. Quantum ad primum. Pergit ibidem S. Doctor sic: *Sed quædam dicuntur habere rationem sic dictam, quod non definitur: sicut quantitas et qualitas et hujusmodi, que non definitur, quia sunt genera generalissima. Et tamen ratio qualitatis est id, quod significatur nomine qualitatis. Unde non refert, utrum illa, que dicuntur habere rationem, habeant, vel non habeant definitionem. Et sic patet, quod ratio*

Attributa
divisa tum inter
se tum ab
essentia non
distinguuntur
sola ratione
ratiocinante,

auditio nomine essentiae divinæ, aut sapientiæ, aut bonitatis, aut intelligentiæ, etc., non esse idem, sed diversum; licet a parte rei enitas, quæ est essentia, sit eadem ipsissima, quæ est sapientia, bonitas intelligentia, etc. Sicut animal et rationale in homine unum quidem sunt re ipsa, diversæ tamen sunt rationes intelligibiles utriusque. Profecto si quis defiire vult, aut quomodolibet explicare essentiam et attributa, per diversissimas notas intelligibiles illa manifestat, ut passim experimur in hoc tractatu de Deo (1).

Prob. 3. Nisi assuratur distinctio saltem rationis, dicendum est, omnia nomina, qua Deo tribuantur, esse prorsus synonyma. Ea quippe synonyma sunt, quæ significant unum secundum unam rationem (2), sicut gladius et ensis v. g. Unde quod plura nomina sint synonyma bifariam, impeditur, ut patet, vel ex eo quod significant realitates a parte rei distinctas, vel saltem exprimant diversas rationes intellectas in eadem simplici re (3). Atqui ex communi sententia nomina essentiæ divinorumque attributorum non sunt synonyma, neque aliunde important realitates diversas. Ergo (4).

Egregie S. Basilis hoc pacto urgetabat Eunomium: *Quod si omnia bac unum ad significandum tendunt, necesse omnino est, ut nomina idem inter se valeant, quemadmodum fit in his, quæ multis nominibus appellantur: sicut cum eundem dicimus Simonem, Petrum et Cepham. Quare qui audiet immortalitatem Dei, deveniet ad ingenerationem; qui audierit indivisibilem esse, ad creanam facultatem deferetur. Et quid bac confusione fieri possit absurdius? Si quis videlicet adempto proprio uniuscujusque nominis significato, tum communi usui tum spiritus doctrinæ repugnet?... Nonne igitur manifesta est insanita, si dicas, proprium significatum unicuique nominis subjectum non*

sapientiæ, qua deo dicitur est id, quod concipiatur de significacione hujus nominis, quamvis ipsa sapientia definiri non posat.

(1) Cfr. S. Thom. 1^a dist. 2, quest. 1, art. 2.

(2) S. Thom. 1 p. quest. 13, art. 4 ad 1.^{um} Cfr. *Contr. Gent.* lib. 1, cap. 35.

(3) S. Thom. de potent. quest. 7, art. 6.

(4) Vide S. Thom. 1 p. quest. 13, art. 4, r.^a *Contr. Gent.* cap. 35, de potent., quest. 7, art. 6.

esse; sed contra verborum vim decernas, nomina omnia idem inter se valere? (1).

Secunda pars: *Attributa divina.... non distinguuntur solum per connotationem ad exteriores effectus, est contra Nominales.* Ante probationem autem intellige bene, disputationem cum Nominalibus versari circa sensum exclusivum distinctiōnis, et quidem omnium divinorum attributorum perfectiōnumque. Ut ergo illos oppugnemus, necesse non est, tenere nullam prorsus divinam perfectionem explicari, et concepi, atque adeo distinguiri a nobis posse in ordine ad connotata diversa: nam ubicumque detur relatio aliqua, utique rationis, in divina perfectione ad res creatas, potest etiam considerari ea relatio, et sic concepi perfectio cum praedicta connotatione, limno sunt quedam perfectiones, que non possunt alter distinguiri, ut v. g. virtus creandi angelum vel animam et producendi corpus actione generativa, videlicet educendo formam de potentia materiæ. Et sunt etiam quedam denominations in Deo, que sunt pure extrinsecas ac temporaneæ, v. g. *Creatoris, Redemptoris*, quæ formaliter non præ se ferunt aliquid intrinsecum Deo, quæ prout non concepiuntur nisi per connotationem ad effectus externos: quamquam haec denominations ita formaliter accepte proprie non comprehenduntur sub nomine attributorum, quemadmodum in primo articulo hujus capituli notatum reliquimus. Itaque hic solum intendimus reprobare, quod proprie constituit opinionem Nominalium, attributa omnia non alter distinguiri inter se vel ab essentia divina posse nisi per externa connotata.

(1) S. Basilis lib. 1.^a *Contr. Eunom.* num. 8. Huc quoque afferri possent propositiones 23, et 24 Ekclardi c 28 damnatis a Joanne XXII. Prima ita se habet. «Deus unus est omnibus modis, et secundum omnem rationem: ita ut in ipso non sit inventre aliquam multitudinem in intellectu vel extra intellectum. Qui enim duo videt, vel distinctionem videt, Deus non videt. Deus enim unus est extra numerum et supra numerum, nec ponitur unus cum aliquo. Nulla igitur in Deo distinctio esse aut intelligi potest». Hic vero est altera: «Omnis distinctio est a Deo aliena, neque in natura neque in Personis probatur, quia natura ipsa est una et hoc unum: et qualibet persona est una et id ipsum unum, quod natura.» (Denziger, num. 450, 451, pag. 143). Utraque reperitur inter damnatas a R. Pontifice ut male sonantes, temerariis ac de heresi suspectas, quemadmodum notat Denzinger.

nec solum
per
connotationem
et externos
effectus,

Probatur propositio 1.^o ex praecedentia parte; quia incredibile est, Eunomium eam attributorum et essentiae divine identitatem docuisse, que nec istam Nominalium distinctionem penes connotata duntaxat extrinseca voluerit agnoscere. Ergo sicut Eunomiana doctrina jure merito rejicitur, ita etiam Nominalium opinio rejicienda est.

Prob. 2.^o ex secunda praecedentis partis probatione, quae non minus premit Nominales.

Prob. 3.^o Sunt plurima Dei attributa, quae non important de se copositionem ad effectum vel terminum externum, et æque prædicanda forent de Deo, etiamsi nihil præter ipsum extisset, qualis est v. g. æternitas, immensitas, bonitas, sapientia. Atqui prædicationes istae non possunt dici pure synonyma. Ergo fieri nequit, ut attributa divina invicem et ab essentia distinguantur solum per connotationem ad effectus externos (1).

Prob. 4.^o Si vera esset Nominalium opinio attributa divina formaliter constituerent per illam connotationem, unumquodque enim per id ab alio distinguitur, per quod in se ipso constitutur. Atqui tum attributa non prædicantur de Deo nisi ad denotandam causalitatem et efficientiam ipsius ad extra: quod in praecedenti articulo exclusimus (2). Ergo... Denique veritas haec magis confirmabitur ex dicendis in probatione tercia parti.

sed ratione
cum fundamen-
to in re.

Tertia pars: *Attributa divina inter se et ab essentia divina distinguantur virtualliter seu ratione cum fundamento in re.*
Prob. 1.^o *Attributa divina hoc pacto distinguuntur ab essentia, si simplicissima entitas Dei sit essentialiter omnis perfectio.* Atqui ita se res habet. Ergo.

(1) *Quidam autem dicunt, quod ista attributa non differunt nisi penes connotata in creaturis, quod non potest esse, tum quia causa non habet aliquid ab effectu, sed e converso, unde Deus non dicitur sapiens, quia ab eo est sapiens, sed potius res creata dicitur sapiens, in quantum imitatur divinam sapientiam, tum quia ab aeterno, creaturis non existentibus, etiamsi nunquam futura fuissent, fuit verum dicere, quod est sapiens, bonus et hujusmodi. Nec idem omnino significatur per unum et per aliud, sicut idem significatur per nomina synonyma.* S. Thom., 1.^o dist. 2, quest. 1, art. 2.

(2) *Vide num. 87, pag. 208.*

Minor patet ex superiori probatis. *Major non est minus manifesta.* Quia si divina entitas sit essentialiter omnis perfectio, poterit vere cognosci conceptibus præcisivis perfectionum, quarum ideas habemus. Ita ergo essentia et attributa, quamvis unum idemque sint in se, reale fundamentum præbebunt, propter eminentiam videlicet perfectionis, ut diversis rationibus mentalibus represententur, quarum singulae imperfectius et inadæquatus divinam entitatem exprimant, quam plures simul. Resque illustratur exempli modo adductis, cum explicarentur fundamenta distinctionis virtualis (1). Hanc rationem breviter teligit S. Thomas illi verbis: *Hoc ipsum ad perfectam Dei unitatem pertinet, quod ea, quae sunt multipliciter et divisim in aliis, in ipso sunt simpliciter et unitate.* Et ex hoc contingit, quod est unus re et multiplex secundum

(1) *Egregie S. Thomas: Omnia ista, quae non dicunt aliquam materialem vel corporalem dispositionem, in Deo vere sunt et verius, quam in aliis, nec aliquam compositionem in ipso indicant: immo sicut ista nominis proprii convenient creaturae propter diversa in ipsa existentia, ita etiam proprie convenient Deo propter unicum et simplex suum esse, quod omnium in se virtutes uniformiter præcipit, ut Dionysius dicit (cap. 5 de divin. Nomin.), quod patet similiter. Si ponantur tres homines, quorum unusquisque secundum suum habitat sciat ea, quae pertinent ad unam scientiam, scilicet naturalia, geometria, et grammatica; et quartus, qui horum omnium per unum habitat scientiam habeat, de quo constat, quod vere poterit dici, quod est grammaticus, vel grammatica est in eo, et similiter geometria et philosophia. Et quomodo in eo non sit nisi una res, secundum quam omnia haec sibi convenient, tamen aliud et aliud secundum rationem nominis unumquodque horum in ipso nominat, eo quod unumquodque eorum imperfecte exprimit illam rem. Ita etiam est in Deo. Cum enim in aliis creaturis inventur diversa in eis existentia; in Dō tamen unus suum simplex esse habet omnium horum virtutem et perfectionem. Unde cum Deus nominatur ens, non exprimitur aliquid nisi quod pertinet ad perfectionem ejus et non tota perfectio ipsius; et similiter cum dicitur sciens, volens, et hujusmodi; et ita patet, quod omnia haec unum sint in Deo secundum rem, sed ratione differunt, quae non tantum est in intellectu, sed fundatur in veritate et perfectione rei; et sicut proprio Deus dicitur ens, ita proprio dicitur sciens et volens et hujusmodi; nec est ibi aliqua pluralitas vel additione vel ordine in re, sed in ratione tantum. S. Thom., 1.^o dist. 35, quest. 1, art. 1 ad 2.^{um}. Cfr. de veritate, quest. 2, art. 1.*

rationem, quia intellectus noster ita multipliciter apprehendit eum, sicut res multipliciter ipsum representant (¹).

Dices ex Aureolo, eminentiam divini esse etiam conjunctam cum imbecillitate humanae intelligentiae non præbere solidum fundamentum distinctionis rationis; nam etiam sapientia v. g. divina, et quodvis aliud simile attributum, est eminentia infinita, at nihilominus non potest ab intellectu distinctis rationibus ac formalitatibus reapse representari. Ergo a pari dicendum est, nullum esse fundamentum distinguendi ratione inter essentiam et attributa.—Respondeo, neg. partem, quia sapientia et quodvis simile attributum particula-re habet quidem eminentiam infinitam, sed præcise prout talis sapientia, concipiatur jam restricta ad lineam particularem sapientie; ideoque jam non est fundamentum novas inven-hendi distinctions aliarum divinarum perfectionum, saltem nisi forte velis adhuc intellectu magis in particulari con-siderare humano modo diversas partes et genera scientiarum intra lineam sapientie.

Prob. 2.^o Nos non possumus cognoscere divina nisi per species rerum creatarum. Atqui species hujusmodi generatim repræsentant perfectiones præcisive seu alias seorsim ab aliis, sive quia divisæ ac dispersæ in rebus diversis reperiuntur, sive quia quamvis unitæ sint plures in eodem subiecto, non tamen nobis innotescunt nisi seorsim ac successive per effectus ac manifestaciones externas. Ergo quamvis essentia et attributa sint unum idemque re in Deo, non possunt a nobis in hac vita exhiberi nisi distinguendo illa per rationem. Et hoc est alterum fundamentum distinctionis ex eo petitum quod Deo insint unitæ perfectiones, que in aliis rebus sepa-ratae inveniuntur, et nonnisi separatim cognosci ab homine queunt.

Utramque hanc rationem distinguendi, eminentiam nem-pe divinæ perfectionis et imbecillitatem intellectus nostri in cognoscendo docuit nos S. Thomas, cum haec scripsit: *Omnes istæ multæ rationes et diverse habent aliquid respondens in ipso Deo, cuius omnes istæ conceptiones intellectus sunt similitudines.* Constat enim, quod unus forma non potest

(1) S. Thom., i p., quest. 13, art. 4, ad 3.^{um}

esse nisi una similitudo secundum speciem quo sit ejusdem rationis cum ea; possunt tamen esse diverse similitudines imperfectæ quarum quelibet a perfecta formæ repræsentatione deficiat. Cum ergo, ut ex superioribus patet, concep-tiones perfectionum in creaturis inventarum, sint imperfectæ similitudines, et non ejusdem rationis cum ipsa divina essentia, nibi prohibet, quin ipsa uia essentia omnibus predictis concep-tibus respondeat, quasi per eas imperfecte representata. Et sic omnes rationes sunt quidem in intellectu nostro sicut in subiecto; sed in Deo sunt ut in radice verificante has conceptiones. Nam non essent vero conceptiones intellectus, quas babel de re aliqua, nisi per viam similitudinis illis conceptionibus res illa responderet. Diversitas ergo vel multiplicitas nominum causa est ex parte intellectus nostri, qui non potest pertinere ad illam Dei essentiam videndam, secundum quod est, sed videt eam per multis similitudines ejus deficientes, in creaturis quasi in speculo resultantes. Unde si ipsam essentiam videret, non indigeret pluribus conceptionibus. Et propter hoc Dei verbum, quod est perfecta conceptionis ipsius, non est nisi unum: propter hoc dicitur (Zach. ult. 9): *In die illa erit Dominus unus et nomen ejus unum, quando ipsa Dei essentia videbitur et non colligetur Dei cognitionis ex creaturis* (¹).

Postrema verba S. Doctoris continent frequentem illam scriptorum (²) sententiam (aliis tamen dissentientibus), qui negant Beatos in celo distinguere divinam essentiam et attributa in visione beatifica. Quia cum non cognoscant Deum per species vel similitudines rerum creatarum, sed per ineffabilem unionem objectivam ipsius Dei cum intellectu Beatorum, vident illum prout est in se purissime simplicem et infinite perfectum, atque infinite imitabilem ad extra. Ex

Besti
In euc'lo non
distingunt
essentiam
Dei ab
attributis.

(1) S. Thom., *de potent.*, quest. 7, art. 6 fin. corp. Cfr. i. p. quest. 13, art. 4, ubi etiam præclare idem explicatur: itemque i. dist. 2, quest. 1, art. 3 corp. et ad 5^{um}, et art. 2; opuscul. 9, *de articulis centum*, quest. 1, 2, et 3; *Contr. Gent.* lib. 1, cap. 3^o fin.; et cap. 35; *de potent.* quest. 1, art. 1, ad 12^{um}.

(2) Vide v. g. Capreol. (i. dist. 8, quest. 4, art. 3 fin.), Suarez (*de Deo*, lib. i. cap. 13, num. 7; *de Trinit.* lib. 4, num. 17), Vazquez (i. 1^{am} part. disp. 118, cap. 2), etc. Et vide P. Tanner (*de Deo*, disp. 2, quest. 2, dub. 4, num. 7 seqq.).

quo melius intelligitur etiam intima ratio distinguendi divina per intellectum creatum extra visionem intuitivam; quia nimirum intellectus creatus non potest aciem suam directe et immediate convertere in illam eminentem simplicitatem infinitae perfectionis, sed tantum illam attingit utcumque per deficientissimas imitationes creatas, quarum singulae non exprimunt, nisi exiguum partem illius secundissimae virtualitatis et plenitudinis totius esse (1). Quae est etiam doctrina S. Bernardi (2).

An Deus ipse possit suam essentiam ab attributis distinguere.

Objectiones soluta.

Quærunt hic nonnulli, utrum Deus ipse possit intellectu distinguere suam essentiam ab attributis; et responsio certissima negativa est. Deus enim videt quidem distinctiones rationis, quas creatus intellectus facit, ipse vero non potest distinguere; quia distinctio rationis essentialiter importat cognitionem imperfectam et limitatam, utpote solum particulariter objectum repräsentantem; Deo autem sicut repugnat multiplicitas cognitionis, ita etiam repugnat cognitio, quae non sit adæquata et comprehensiva rei cuiuslibet.

101. *Objic.* 1.^a Omnis distinctio rationis imminuit unitatem ac simplicitatem Dei. Sed Deus simplicissimus est. Ergo... Probatur Major. Nam simplicitati perfecte adversatur quævis compositio etiam rationis. Sed ubicumque adest pluralitas rationum, nequit non esse compositio saltem rationis. Ergo...

Respondeo, neg. Major. *Ad probation.* etiam *transseal* Major, neg. Minor. Nam licet compositio realis repugnet simplicitati ac perfectioni divinæ, et etiam compositio rationis

(1) *Intellectus autem noster, cum cognoscat Deum ex creaturis, format ad intelligendum Deum conceptiones proportionatas perfectionibus procedentibus a Deo in creaturas. Quæ quidem perfectiones in Deo præexistunt unitate et simplicitate. Sicut igitur diversis perfectionibus creaturarum respondet unus simplex principium representatum per diversas perfectiones creaturarum varie et multipliciter; ita variis et multiplicibus conceptibus intellectus nostri respondet unus omnino simplex, secundum hujusmodi conceptiones imperfecte intellectum. Et ideo nomina Deo attributa, licet significant unam rem, tamen quia significant eam sub rationibus multis et diversis, non sunt synonyma.* S. Thom. 1^a p. quest. 13, art. 4. Cfr. ib. art. 2; de potent. quest. 7, art. 5.

(2) *De Considerat.* lib. 5, cap. 13.

genus ac differentiam complectens, ut mox dicemus; at vero utrum compositio illa rationis, quæ solam multiplicitatem rationum intelligibilium in una simplici entitate comprehendit, adversetur, necne, divinæ simplicitati, disputatur inter Theologos. Negant Suarez (1), Vazquez (2), Christopherus Gillius (3), aliique; affirmant Capreolus, Tanner aliique multi, ut postea dicemus, agentes a divina simplicitate. Sed quidquid sit de hoc, pluralitas rationum ex se sola non sufficit ad inducendam compositionem etiam rationis; aliud enim est distinctio et multiplicitas rationum, aliud compositio, utpote quæ importat multas rationes non utcumque, sed ut *unitas*. Verum de his suo loco uberioris.

Objic. 2.^a «Magis unum est, quod est unum re et ratione, quam quod est unum re, et multiplex ratione. Sed Deus est maxime unus. Ergo videtur quod non sit unum re et multiplex ratione» (4).

Respondeo, dist. Major.: magis unum re, neg.; ratione, trans. Et neg. conseq. *Pluralitas attributorum*, inquit S. Thomas, in nullo præjudicat summa unitati; quia ea, quia in aliis sunt ut *plura*, in eo sunt *unum*, et remanet pluralitas tantum secundum rationem, quæ non opponitur summa unitati in re, sed necessario ipsam consequitur, si simul adsit perfectio (5). Etenim hoc ipsum ad perfectam Dei unitatem pertinet quod ea, quæ sunt multipliciter et divisim in aliis, in ipso sint simpliciter unita. Et ex hoc contingit, quod est unus re, et plura secundum rationem; quia intellectus noster ita multipliciter apprehendit eum, sicut res multipliciter ipsum repräsentant (6).

Objic. 3.^a «Quidquid est in Deo, Deus est. Si ergo istæ rationes, secundum quas attributa differunt, sunt in Deo, ipsæ sunt Deus. Sed Deus est unus et simplex. Ergo istæ rationes, secundum quod in Deo sunt, non sunt plures» (7).

(1) *De Deo* lib. 1, cap. 4, num. 8; *Metaphys.* disp. 30, sect. 4, num. 38 seqq.

(2) In 1.^{um} part. disp. 22, cap. 2.

(3) Lib. 2, tract. 4, cap. 14; tract. 6, cap. 6.

(4) Apud S. Thom. 1^a p. quest. 17, art. 4, arg. 3.^a

(5) 1.^a dist. 2, quest. 1, art. 2, ad 1^{um}

(6) S. Thom. 1^a p. quest. 13, art. 4, ad 3.^{um}

(7) Apud S. Thom. 1.^a dist. 2, quest. 1, art. 3, argum. 4.^a

Respondeo, neg. suppositum ultimi consequentis. Jam enim diximus multas illas rationes subjective non esse in Deo, sed in intellectu concipiente; in Deo autem non esse nisi sicut in fundamento ac radice verificante propter suam eminentiam perfectionis diversos conceptos ac representationes intellectuales, quemadmodum in probationibus explicatum est.

Sicut ratio hominis non dicitur esse in homine quasi res quedam in ipso, sed est sicut in subiecto in intellectu, et est in homine, sicut in eo, quod praestat fulcimentum veritatis ipsius; ita etiam ratio bonitatis divine est in intellectu sicut in subiecto, in Deo autem sicut in eo, quod correspondet per quamdam similitudinem isti rationi faciens ejus veritatem. Unde patet, quod ratio procedit ex malo intellectu ejus quod dicitur (1). Numquam enim diximus rationes diversas divinorum attributorum et essentiæ, prout in Deo sunt, esse multis res, sunt enim una simplicissima res; sed haec simplicissima res ob suam perfectionem et est essentia, et bonitas et justitia et intellectus et voluntas. Potest proinde cum veritate representari ab intellectu nostro sub omnibus istis diversis rationibus per totidem actus precisivos. Et sic multiplicitas ista attributorum nullo modo ponitur in Deo, quasi ipse secundum rem sit multiplex, sed tamen ipse secundum suam simplicem perfectionem similitudini istorum attributorum correspondet, ut vere de Deo dicantur (2).

Objic. 4.^o Unius formæ non datur nisi una similitudo idealis. Ergo si in ipsa divina substantia non esset realis multiplicitas rationum, neque posset esse in intellectu.

Respondeo, dist. antec.: adæquata et perfecta, conc.; inadæquata et imperfecta, neg. Constat enim, quod unius forma non potest esse nisi una similitudo secundum speciem, quæ sit ejusdem rationis cum ea, possunt tamen esse diversæ similitudines imperfectæ, quarum qualibet a perfecta forme representatione deficit. Cum ergo, ut ex superioribus (art. præc.) patet, conceptiones perfectionum in creaturis inventarum sint imperfectæ similitudines, et non ejusdem rationis cum ipsa divina

(1) S. Thom. 1.^o dist. 2, quest. 1, art. 3, ad 4.^{um}

(2) S. Thom. 1.^o dist. 2, quest. 1, art. 3, ad 3.^{um} Cir. alia S. Thomasa testimonia paulo superius laudata.

essentia; nihil probabet, quin ipsa una essentia omnibus praeditis conceptionibus respondeat, quasi per ipsas imperfecte representata. Et sic omnes rationes sunt quidem in intellectu nostro, sicut in subiecto, sed in Deo sunt ut in radice verificante has conceptiones. Nam non essent verae conceptiones intellectus, quas habet de re aliqua, nisi per viam similitudinis illis conceptibus res illæ responderent (1).

Objic. 5.^o «Illud quod in se est unum omnibus modis, non est radix aliquius multitudinis in eo existens. Sed essentia divina est una omnibus modis, quia est summe una. Ergo non potest esse radix aliquius multitudinis in ea existens. Pluralitas ergo dictarum rationum non radicatur in essentia divina, sed in intellectu tantum» (2).

Respondeo, dist. Major.; in eo existentis formaliter et objective, conc.; in eo existentis virtualiter seu tamquam in fundamentali ratione, cur vere sint plures conceptiones intellectus predicationesque diversæ, neg. Aliquid dicimus fundari vel radicari in aliquo metaphorice, ex quo firmitudem habet. Rationes autem intellectus babent duplē firmitudinem, scilicet firmitudinem sui esse, et hoc babent ab intellectu, sicut alia accidentia a suis subjectis; et firmitudinem sive veritatis, et hoc babent ex re, cui conformantur. Ex eo enim quod res est, vel non est, locutio et intellectus veritatem vel falsitatem habet. Rationes ergo attributorum fundantur, vel radicantur in intellectu quantum ad firmitudinem sui esse, quia, ut dictum est (art. antec.) intellectus est eorum subjectum; in essentia autem divina quantum ad firmitudinem sua veritatis. Et hoc in nullo repugnat divinae simplicitati (3). Brevius: rationes istæ non fundantur in divina essentia, sicut in subiecto, sed sicut in causa veritatis, vel sicut in representanto per omnes, quod ejus simplicitati non derogat (4).

Objic. 6.^o «Distinctio relationum, quæ realiter sunt in Deo, facit pluralitatem Personarum. Si ergo istis rationibus communibus attributorum aliquid responderet in Deo, etiam

(1) S. Thom., de potent., quest. 7, art. 6 vers. fin.

(2) Apud S. Thom. 1.^o dist. 2, quest. 1, art. 3, arg. 5.

(3) S. Thom. 1.^o dist. 2, quest. 1, art. 3, ad 5.^{um}

(4) S. Thom., de potent., quest. 7, art. 6, ad 6.^{um}